



Otode President Henry B. Eyring  
Akpa Ono-item ke First Presidency

## Kufehe Ndik Ndinam Eti

*Abasi odoho nnyin ete ke nnyin ima inyene mbuotidem ida ke itiat Esie, ke eyighe ye ndik eyekure; ndien udong ndinam eti nkpo okori.*

**N**dima ndito-eka mi irenowo ye iban, ami mbon akam mbenge Spirit Jehovah ndidu ye nnyin ke nte ami ntingde iko mfin emi. Esit mi oyoho ye ekom abanga Jehovah, emi edi Ufok Abasi esie, ke edidiong emi nnyin inyenede ito okposong akam, ukworo iko, ye ndikwo nte mme angel ke mbono emi.

Ke Ofiong inang emi ebede mi, President Thomas S. Monson ama okworo iko emi eketukde esit mme owo ke ofuri ererimbot, ye okim nko. Enye eketing abanga odudu eke Nwed Mormon. Enye ama odoho yak nnyin ikpep, ikere ibanga, inyung isin mme ukpepnkpo esie ke edinam. Enye ama onwongo ete ke edieke nnyin ibiatde ini ke usen ke usen ke ndikpep nyung nkere mbanga nyung nnam mme mbet emi odude ke Nwed Mormon, nnyin iyenyene akpan ntiense ibanga akpaniko esie, ndien iko ntiense abangade odu uwem Christ eyenam nnyin iboho ke mme ini afanikong. (Se ke “Odudu eke Nwed Mormon,” *Liahona*, May 2017, 86–87.)

Nte ediwak mbufo, ami nkop uyo prophet nte uyo Jehovah etingde iko ono mi. Ndien, nte ediwak mbufo nko, ami nkop item eke mme iko oro.

Idahaemi, tongo ke ini nkedide ekpri eyen eren, ami mmenyene iko ntiense nte ke Nwed Mormon edi iko Abasi, nte ke Ete ye Eyen ema ewut idem enyung eting iko ye Joseph Smith, ndien ke nkani Apostle ema eka ebine Prophet Joseph ndino ukpohore idaha itie oku eke Ufok Abasi Christ.

Ye iko ntiense oro, ami mmekot Nwed Mormon kpukpru usen ke awakde akan isua Aba-ye-duop. Ke ntak oro ami mkpekekere nte ke iko President Mormon ekenyene owo efen. Edi, nte ediwak mbufo, ami mma nkop nsongo eke prophet ndien ke enwongo esie okot mi ete ntim nsin ifik. Ediwak mbufo ema enam se ami nkenamde: ntim mbong akam, ntim nkere mbanga nwed Abasi, nyung nsin ifik ndinam mkpo nno Jehovah ye ndinam nkpo nno mbon efen ke ntak Esie.

Utit inem esit ami nyenede, ye ediwak mbufo nko, edi se prophet eke onwongode. Nnyin oro ikekopde item esie ke esit ikekop ito spirit nnen-nnen. Nnyin imekop odudu ndibe ke idomo inyung inyene okposong mbuotidem ke Jesus Christ emi ekesetde, ke iko Abasi Esie, ye ke odu uwem Ufok Abasi Esie.

Ke ini emi ekong okponde ke ererimbot, mme iko ntiense oro emi akade iso okori ebin eyihe ye ndik osio onyung ono nnyin emem. Ndikop item President Monson anam ikpo nkpo iba ono mi: Akpa, Spirit emi enye eke onwongode ono osongo abanga se inade ke iso, okposuk edi nte ndutime okpongde ke ererimbot. Ndien, oyoho iba, Jehovah ono mi-ye afo-ekikere ima emi okponde kabanga mbon emi edude ke ukut. Nnyin imenyene akwa udong ndi kenyanga mbon efen. Udong oro edi akpan-nkpo ke utom ye ukpepnkpo President Monson.

Jehovah ama onwongo ima ono mbon efen ye osongo ono Prophet Joseph Smith ye Oliver Cowdery ke ini utom eke anade mmo ke iso eke etiede nte edi ata akamba. Jehovah ama odoho ete ke odudu mmo eyomde edito mbuotidem mmo ke Enye nte itiat mmo:

“Kufehe ndik ndinam eti, ndito irenowo mi, koro se ededi emi mbufo etode, oro nko ke mbufo edidok; ke ntre, edieke otode eti mbufo nko eyedok eti nte utip mbufo.

“Ke ntre, kufehe ndik, mkpri ufene; enam eti; yak isong ye hell ediana kiet ke ndinwana ye mbufo, koro edieke ebopde mbufo ke enyong itiat mi, mmo idikanke.

“Sese, ami mbiomoke mbufo ikpe; eka usung mbufo enyung etre ndinam idiok; esuk ibuot enam utom emi ndongde mbufo.

“Ese mi ke kpukpru ekikere; ekuyihe, ekufehe ndik.

“Ekam ese unan ke nkang mi, ndien nko ye mbon ukwak ke ubok ye ikpat mi; enyene mbuotidem, enim

ibet mi, ndien mbufo eyenyene obio ubong heaven.” (D&C 6:33–37).

Jehovah ama odoho mbon ekedade iso ke Edifiak-mmen-ndi, ndien Enye odoho nnyin, ete ke edieke idade ye mbuotidem ke enyong itiat Esie, eyihe ye ndik ekure; udong ndinam eti okori. Nte nnyin inyimede ikoot President Monson ke ndito ke esit nnyin iko ntiense Jesus Christ, nnyin inyene odudu, udong, ye nsongo ndika nkenyanga mbon efen ikereke ibanga idem nnyin.

Ami mmokut mbuotidem ye nsongo oro ediwak ini ke ini mme ndisana Owo ke Ukperedem Usen emi enimde ke akpan iko enyenede mfina. Nte uwutnkpo kiet, ami nkedu ke Idaho ke ini Teton Dam eke obomode ke June 5, 1976. Ibibene mmong ama oduo ke isong. Ediwak tosin mme owo ema efehe ekpong ufok mmo. Ama osobo ediwak tosin ufok ye mbubehe. Ke utibe-utibe usung, mbon owo emi ekekpade ema ekpri ekan Efut.

Se ami nkecutde do, edi se nsikutde ke ini ekededi emi mme ndisana Owo ke Ukperedem Usen esongode eda ke itiat ntiense Jesus Christ. Koro mmo minyeneke eyihe Enye ekpeme mmo, ndik okpong mmo. Mmo ekpong ukut mmo eka ndinwam mbon efen. Ndien mmo enam emi eto ke ima mmo enyenede eno Jehovah, ibupke iyom usiene.

Nte uwutnkpo, ke ini Teton Dam eke obomode nnwan ye ebe eke mme ndisana Owo ke Ukperedem Usen ekeka isang, ke ayan usung ekpong ufok mmo. Ke ini mmo ekekopde mkpo ntibe emi ke radio, mmo esop efiak enyong eka Rexburg. Utu ke mmo eka ekese mme ufok mmimo owure, mmo esanga eyom bishop mmo. Enye okodu ke ufok ekenimde nte itie nduok odudu. Enye ekenwam ndino nda usung ke abanga mme tosin owo emi ekesangade ke uto-uto moto ndito ufoknwed edi do man enwam ke utom.

Nnwan ye ebe oro esanga ebine bishop ekedoho ete, “Idaha oro ke inyong idi. Bishop, mmong ke

ana nte nnyin ika man ikewam?”

Enye ama ono mmo enyin mbon ufokemana kiet. Ebe ye nnwan oro efop mmong ye mbat esio ke ufok kiet kiet. Mmo enam utom tongo ke usenubok tutu mbubreyo ke ediwak usen. Mmo ke akpatre ema ebo nduok odudu man eka ekese ufok mmo. Ufok mmo ama oduo owure osop ke mmong-ukwo oro, nkpo ikosuhoke se anade nte ekwok. Ke ntre mmo enwongore ete yak ika ibine bishop mmimo. Mmo ebup ete, “Bishop, ndi emenyene owo emi anade nte nnyin inwam?”

Utibe odudu ye ima oro—edisana ima Christ—edi se enamde ke ediwak isua ye ke ofuri ererimbot. Ama etibe ke idiok eyo ukobo ye idomo ke ini Prophet Joseph Smith ke Missouri. Ama etibe nte Brigham Young ekedade udim owo oworo okpong Nauvoo ndien enye okot ikot Abasi ete ekpong ebiet mmo ke edem usoputin ke United States, ete enwam kiet eken ndibop Zion nno Jehovah.

Edieke mbufo okotde se mme ada iso oro ekewetde ke journal, mbufo eyekut nte utibenkpo eke mbuotidem ebinde eyihe ye ndik osio. Ndien mbufo ekot ebanga nte mme ndisana owo ekpongde mfina mmo eka ekenwam owo efen eno Jehovah, mbemiso mmo eka ebine erong mmo mme ndika nketo inwang mmo.

Ami mma nkut ukem ukem utibenkpo emi usen ifang emi ekebede mi ke ini Hurricane Irma ke Puerto Rico, Saint Thomas, ye Florida, emi mbon Latter-day Saints edianade ye mbon Ufok Abasi efen, mbon eboho ke obio, ye mme nka ke idut man etongo utom edinam nkan-nkuk asana.

Nte mme ufan mi eke Rexburg, ebe ye nnwan kiet eke midighe mbon Ufok Abasi nnyin ke Florida ema enam utom ndinwam obio nte etrede ndinam eke ufok mmo. Kini ubak mbohoidung mbon Latter-day Saints enode unwam ke nte ikpo eto iba okoduode abaha usung, ebe ye nnwan emi edoho ete ke esit ama enem mmimo anam mmimo iworu idi man idinwam mbon efen, inyene

mbuotidem ete ke Abasi eyeno unwam emi mmimo iyomde ke ufok mmimo. Ndien ebe eketing mbemiso mbon Ufok Abasi ekedisim ye ndino unwam, ete ke mmimo ikedu ke akam. Ke mmimo ima ibo iboro ete ke unwam eyedi. Unwam oro ama edi ke ufot ini nsongonda oro.

Ami mmekop etop ete ke ubak owo etongo ndikot mbon Latter-day Saints emi esinede utouto ofong Helping Hands emi nte “mme Uto-uto Angel.” Owo Ufok Abasi nnyin kiet ekemen moto esie aka ndidiong, ndien erenowo emi akanwamde enye eting abanga “ifiok-ukpeb spirit” emi enye ekenyende kini mme owo emi esinede utouto ofongidem esiongode mme eto ke anwa-esien esie ndien ekem, “mmo ekwo mme ikwo eno enye ebanga ndidi eyen Abasi.”

Owo efen emi odungde ke Florida—nko idighe owo Ufok Abasi nnyin—eting abanga nte mbon Latter-day Saints ekedide ufok esie kini enye akanamde utom ke anwa esien esie emi akabiarade nte enye okopde inemesit, ufiop, ndien ekpere nditua. Enye eting ke iko esie ete, mme anam utom emi, ekenam, “ata utibe nkpo.” Mmo iketingke enyin inam utom kpot, edi nko ke esasak ye inua imam, ndien iyomke udori ndomokiet.

Ami mma nkut ntingenyin nnyung nkop uyo inua imam oro kini, ke mbubreyo Saturday kiet, ami mma nkese mbon ufok Abasi ke Florida. Mme anam utom emi ema etre utom man eyak mi nkom mmo ubok. Mmo ema edoho ete ke mbio Ufok Abasi mmo Anang-ye-duop eke stake mmo ke Georgia ema enyene uduak ndidiana ke utom uwam emi ke Florida ke okoneyo mbemiso mmo edaha.

Mmo ekekpang Georgia ke nkanika Inang usiere, ewat ke ediwak ini, enam utom ke ofuri usen oro ebe eduk okoneyo ndien ebengeidem ndinam utom efen ke edem usen oro.

Mmo eketing ebanga kpukpru nkpo emi eno mi ye inua imam. Nkukure mfina ami nkecutde ekedi ke mmo ekeyom etre ndikom mmimo

man mmimo ikan ika iso ye utom. Stake president ama afiak emen engine usiak eto esie onyung aka iso ndisibe eto emi okoduode ndien bishop kiet eketang mbio eto osio nte nnyin idukde moto ndika nkese mbon unwam efen.

Ke usenubok oro, ke nte nnyin iwatde iworo ke ebiet utom efen, erenowo kiet ama asanga ekpere moto nnyin ayarade itam esie, onyung okom nnyin nte inode mme owo edinwam mmimo. Enye odoho ete, “Ami ndihe owo ufok Abasi mbufo. Osong mi idem ndinim se mbufo enamde eno nnyin. Abasi odiong mbufo.” Mbon utom LDS emi ekedade ekpere enye ye utouto ofongidem esie esak enyung etuk eye ke afara nte enye ikpedotke ndibo ekom.

Ke ini mme anam utom eketode Georgia ekedide ndiwam owo emi mikinimke, udim ikie mbon ufok Abasi emi eketode ata obio oro mfina ekisimde ke Florida ema eka usuk ke itiat mme ikie ke ikpehe Florida efen emi mmo ekekopde ke eke mmo ama odiok akan eke mmimo.

Usen oro ami nti nyung ntim ndiongo ete ke iko prophecy eke Prophet Joseph Smith odohode ete: “Owo emi oyohode ye ima Abasi, iyuhoke ke ndidiong ufok esie ikpong, edi asanga ke ofuri ererimbot, ye udong ndiong ubon owo” (*Ukpbebnkpo eke mme Adaibuot ke Ufok Abasi: Joseph Smith* [2007], 426).

Nnyin imikut uto ima emi ke uwem mbon ufok Abasi ke kpukpru ebiet. Ini kiet ekededi emi unomo odude ke ebiet ekededi ke ererimbot, mbon ufok Abasi eno unwam ima edian ye eke ufok Abasi. Isidihe tutu ekpekpe owo ubok. Ke akpaniko, ke usuk ini, esina nte nnyin idoho mbon edinode unwam ebet tutu mme adausung ke utom emi ebenge idem ebanga mmo.

Udong ndinwam oro edi mfri mbon oro emi enyenede iko ntiense Jesus Christ, iko Abasi Esie, Ufok Abasi Esie emi ekefiakde emen edi, ye prophet Esie. Ke ntak oro ikot Jehovah inyeneke eyihe inyung

ifeheke ndik. Ke ntak oro ke mme missionary ekworo iko ke kpukpru itung ye inuk ke ererimbot. Ke ntak oro ke mme ete ye eka ediana ye ndito mmo ebong akam eno mbon efen. Ke ntak oro ke mme adausung edoho mme iwaad eda ebenge eke President Monson ndisin idem nkot Nwed Mormon nte akpan nkpo. Mfri oro ikedihe ke mme adausung ekpekde ekpek mbufo edi edi ke mme iwaad ye mbon Ufok Abasi emi enamde utom ke mbutidem. Mbutidem oro, eke emende esin ke edinam, emi oyomde ke nwaidem, adada nkabare esit emi ayakde mmo ekop ima Abasi edi.

Edi, esit nnyin okpuho ke ini nnyin isikade iso ndikop item prophet. Edieke itrede ke ima iketonge, ukpuhore oro eyekpa.

Nti mbon ufok Abasi enam mbutidem mmo ke Obong Jesus Christ okori, ke Nwed Mormon nte iko Abasi, ye ke edifiak mmen ukpohore idaha itie oku ndi ke ufok Abasi akpaniko Esie. Mbutidem oro ono nnyin nsongo ye ekikere abanga ndito Abasi efen. Edi idomo ye mfina emi odudu ke iso eyeyom kpa se ikponde ikan emi.

Nnyin ikanke ikut mme mkpri nkpo odongode, edi nnyin imidiongo nte editiede. Nnyin imidiongo ete ke akpatre usen, ererimbot eyedu ke mfina. Nnyin imidiongo ete ke ufot idomo eke ekpededi, Jehovah eyed anti mbon ufok Abasi usung ke ndida iko Abasi Jesus Christ nka kpukpru obio, idut, usem, ye mme owo. Ndien nnyin imidiongo ete ke nti ikot Abasi eyedot enyung ebengede idem eno Enye ke ini Enye edifiakde idi. Inaha nte nnyin ifehe ndik.

Ke ntre, sia nnyin ima inyene mbutidem ye nsongo ke esit nnyin, Jehovah oyom se ikponde ikan emi oto nnyin—ye ubon nnyin emi edide ke iso. Ana nte mmo esong odudu ekan nnyin koro mmo eyenam ikpo ye mkposong nkpo ekan se nnyin ikanamde. Ndien mmo eye ekut akamba idomo eto usua ukpong nnyin.

Jehovah ama ono usung ke nnyin ndinyene nsongo nte ikade iso: “Se mi ke kpukpru ekikere; kuyik, kufehe ndik” (D&C 6:36). President Monson ama odoho nnyin nte idinamde oro. Ana nte nnyin ikere ibanga inyung isin Nwed Mormon ye iko mme prophet ke edinam. Bong akam kpukpru ini. Nim ke akpaniko. Nam nkpo nno Jehovah ke ofuri esit, odudu, ekikere, ye ukeme nnyin. Akam edidi ukpohore nko man nnyin idibo eno ndima iko Abasi inyung ikeme ndima Christ (se ke Moroni 7:47–48). Ndien ke akande oro, ana nte nnyin ituak-ida inyung iyire ke ndikop item eke prophet nnyin.

Ke ini usung osongde, nnyin imikeme ndidori enyin ke enwongo Jehovah—enwongo emi President Monson etide nnyin abanga ke ini enye esiwakde nditing iko Andinyanga: “Owo ekededi emi enyimede mbufo, do nko kea mi ndidu, koro nyeka ke iso mbufo. Ami nyedu ke ubok nnasia ye ubok ufien mbufo, ndien Spirit mi eyedu ke esit mbufo, ndien mme angels mi ekanare mbufo ekuk, ndikpeme mbufo” (DC 84:88)

Ami mmetie ntiense nte ke Jehovah eyebem mbufo iso ke ini ekededi emi mbufo ekade utom Esie. Usuk ini mbufo eyedi angel oro emi Jehovah onode ndimenere mbon efen ke enyong. Usuk ini mbufo eyedi enye emi mme angel ekanare ekuk ndikpeme mbufo. Edi kpukpru ini mbufo eye enyene spirit Esie ke esit mbufo, nte enwongode eno mbufo ke kpukpru mbono udia-Obong. Mbufo enyene ndinim mme mbet Esie ikpong.

Mme usen efonde ekan edu ke iso eno obio ubong Abasi mi ke isong. Usua eyenam mbutidem nnyin ke Jesus Christ okori, nte ekedide tongo ke eyo Prophet Joseph Smith. Kpukpru ini mbutidem akakan ndik. Edidiana kiet anam mboho odu. Ndien akam eke mbufo ebongde eno mbon unana obo iboro oto edima Abasi. Idem imemke Enye ndien Enye nko idehe idap.

Ami nno iko ntiense mi nte ke Abasi Ete odu ke uwem ndien ke Enye oyom mbufo enyong edi ufok ebine Enye. Emi edi akpaniko ufok Abasi eke Jesus Christ. Enye odiongo

mbufo, Enye ama mbufo, Enye ke ekpeme mbufo. Nditiene Enye ke uwem mbufo ye ke utom unwam mbufo nno mbio efen edi nkukure usung ndinyene nsinsi uwem. Ami

nno iko ntiense mi ndien nyak edidiong mi ye ima mi nno mbufo.

Ami nno iko ntiense mi ndien nyak edidiong mi ye ima mi nno mbufo. Ke edisana enyin Jesus Chrst, amen.

## Mme ukpebnkpo eke Ini Nnyin Emi

**T**ongo ke Ofiong Duopekiet 2017 tutu osim Ofiong Inang 2018, eda ukpebnkpo eke Melchizedek Priesthood ye Relief Society ke oyoho Ederi inang eto kiet mme awakde akan oro ke mme uteting iko emi ekenode ke general conference eke Ofiong Duop ke isua 2017. Ke ofiong Inang 2018, emekeme ndisio mme eteting iko eto general conference eke ofiong Inang ye ofiong Duop eke isua 2016. Mme stake ye district presidents ekeme ndimek ewe uteting iko eke mmo edikpebdeke ebiet mmo, nko mmo ekeme ndiyak ubiong emi nno mme bishops ye branch presidents.

Mme eteting iko emi odu ke mme ediwak usem ke. [conference.lds.org](https://conference.lds.org).



**Andino edi President Dieter F. Uchtdorf**  
Oyoho Onoitem Iba ke First Presidency

## Ndito-eka Iban Ita

*Nnyin inyene ubiong nte owo-mbet ino idem nnyin, ndien oro enyene esisit—edieke odude—se anamde ke usung nte mbon efen ekutde nnyin.*

**N**dima ndito-eka iban, ndima ufan, nditongo akwa mbono ye ikpehe eke ofuri iban ke ererimbot edi akwa inem nkpo. Kere kanga se: ndito-eka iban ke ofuri isua-emana, ebietidung, idut ye usem ndiboho otokiet ke mbuotidem ye ima nno Obong Jesus Christ.

Mmi-mmi emi nte nnyin isobode ye edima prophet nnyin, President Thomas S. Monson, enye eting owut adanga nte imo imade Abasi. Ndien ami mmediongo ke President Monson enem esit abanga ima, akam, ye nsinifik emi mbufo enode Abasi.

Ama odu ufokemana eke ndito-eka iban ita ke anyan ini ko ke anyan ebietidung.

Akpa eyeneka-nnwan ekedi **mfuho**. Kpukpru nkpo tongo ke ibuo esie kesim ebek ye tongo ke ikpa-idem kesim ikpat ikedotkke ye enye. Kini enye etingde iko, iko esie ke ubakini esiworo etikwo, anam mme owo esisaha. Kini owo obiomde enye mme “efefre” ndikot enye ete edi usoro, enye eyekpanga, asanga ebe, ndien okoyom ebiet udibe kiet emi enye edisiamade onyung ekere ntak emi uwem akabare okpu onyung ananade-inem.

Udiana eyeneka-nnwan ekedi **idat**. Enye ekere idem esie ete ke imediongo-nkpo, edi kpukpru ini odu owo efen emi ekesibede udomo ke ufoknwed akan enye. Enye ese idemesie nte ama-mbre, eti, ediye ye nkpo-nyo. Edi kpukpru ini, ebiet nte odu owo efen emi ebrede-mbre, ofonde, eyede, mme ndidi ata owo nyo nkan.

Akananam enye ikedighe akpa ke nkpo ndomokiet, ndien enye ikekemeke ndiyo emi. Uwem ikanaha nte edi ke oruk usung emi!

Nte iboro, ubakini enye eyesue mbon efen, ndien kpukpru ini ebiet nte se owo efen anam ayatat enye esit.

Nte ededi, emi ikanamke etim ema enye mme ndiflok enye awak. Ubakini, ke ndobo okoneyo, enye eyekwaha-ntak edet esie, obop eka-ubok esie, onyung ekere ete ke, “Uwem itimke ifon!”

Ndien eyeneka-nnwan oyoho ita ama odu Enye ibietke mfuho ye idat ndito-eka iban esie, enye ekedi—eti, **adat esit**. Ndien oro ikedighe koro enye ama otim odiongo-nkpo mme nditim nye mme edinyene ukeme akan ndito-eka esie iban. Ihn-ihn,

mme owo ke ubakini ema esisin enye. Ke ubakini mmo ema esisaha se enye esinede nte ofong ye iko emi enye etingde. Mme owo ke ubakini ema esiting idiok-iko edian enye. Edi enye ikayakke oro ndomokiet otim afina enye.

Eyeneka-nnwan emi esima ndikwo-ikwo. Enye ikenyeneke inem uyo-ikwo, ndien mme owo esisak kabanga oro, edi oro ikanamke enye etre. Enye eyedoho ete, “Ami ndiyakke mbon efen ye ekikere mmo akpan mi ke ndikwo-ikwo!”

Ndika-iso nkwo-ikwo anam akpa eyeneka esie nnwan ofuho ye udiana eyeneka esie nnwan edi idat.

Ediwak isua edibe, ndien ke akpatre ndito-eka iban emi kiet-kiet edisim utit uwem mmo ke isong.

Akpa eyeneka-nnwan, emi okokutde ndien afiak okut ete ke uwem oyoho ye edikpu, ke akpatre edikpa ke *mfuho*.

Udiana, emi ke kpukpru usen emi akasuade ndikut obufa nkpo, edikpa nte *idat*.

Ndien eyeneka-nnwan oyoho ita okodu ofuri uwem esie ke ndidara nnyung nkwo-ikwo esie ke ofuri ukeme esie ye eti inua-imam ke iso esie, edikpa ke *idara*.

Nte ededi, uwem idimemke, ndien akananam mme owo idikereke-nkpo ke usung kiet nte ndito-eka iban ita ke mbuk emi. Edi mme akpan uwutnkpo ntem ekeme ndikpeb nnyin nkpo kabanga idem nnyin. Edieke mbufo etiede nte ediwak nnyin, mbufo emekeme ndiflok ubak idem mbufo ke usung kiet, iba mme nte ofuri ita eke ndito-eka iban emi. Yak nnyin itim ise mmo kiet-kiet.

## Owo Ndiokiso

Akpa eyeneka-nnwan okokut idemesie nte owo ndiokiso—nte owo kiet emi enamde-nam nkpo eno.<sup>1</sup> Ebiet nte ke nkpo kiet mme eken emi etibede ono enye ananam enye odu ke unana inemesit. Ye usung ntem ke uwem, enye onono mbon efen odudu ndibiye se enye ekerede ye nte odude uwem. Kini nnyin inamde emi, eyeda nnyin enam se emade—ndien ye nkpo social media eke eyo emi, mme edinam oro eyewuri nnyin oduok.

Ndima ndito-eka iban, nsidi ntak emi mbufo ekpeyakde inemesit mbufo eno owo efen, ye ebobo owo efen, emi ekerede nkpo esisit ebanga mbufo ye eke inemesit mbufo?

Edieke mbufo ekutde ete ke emefina idem kabanga se mbon efen etingde ebanga mbufo, yak ami nno iboro nte: ti owo eke mbufo edide. Ti ete ke mbufo eto ufok ubong eke obio-ubong Abasi, ndito-iban eke Ete ye eka eke Enyong, emi ekarade ke ofuri ekondo.

Mbufo emenyene spirit DNA eke Abasi. Mbufo emenyene nsio-nsio eno emi otode obot spirit mbufo ndien oro okokori kini anyan uwem eke ererimbot spirit mbufo. Mbufo edi eyen eke enyene-mbom ye nsinsi Ete ke Enyong, Jehovah mme Udim, Andikara ke Enyong ye Isong, Enye-emi okobotde ekondo, atara ediwak ntanta-ofiong oyoho ikpa-enyong, onyung onim mme ererimbot ke nde ekara-esie.

Mbufo edu ke ubok Esie.

Ata nti ubok.

Ubok ima.

Ubok ukpeme.

Ndien iduhe nkpo ndomokiet emi owo ekededi editingde ibanga mbufo emi ekemedede ndikpuho oro. Iko mmo iworo ke nkpo ke edade edomo ye se Abasi eketingde abanga mbufo.

Mbufo edi osongurua eyen esie.

Enye amama mbufo.

Kpa kini mbufo eduode, kpa kini mbufo ewongore ekpong Enye, Abasi amama mbufo. Edieke ekerede ke emesop, esisin, mme ke efefre mbufo—ekukop ndik. Eti

Ekpemerong eyeyom mbufo okut. Enye eyemen mbufo odori ke afara Esie. Ndien Enye eyeda mbufo onyong ufok.<sup>2</sup>

Ndima ndito-eka iban mi, mbok eyak ndisana akpaniko emi oduok ntotungo esit mbufo. Ndien mbufo eyekut ete ke odu ediwak ntak ke nditre ndifuho, koro mbufo emenyene nsinsi akanga ndinam oworo-osu.

Edima Andinyanga ererimbot ama ayak uwem ono man mbufo ekpemek ndinam akanga oro enyene unen. Mbufo emeda enying Esie edori ke idem; mbufo edi mbet Esie. Ndien oto ke Enye, mbufo imekeme ndisin idem mbufo ofong ye ewura eke nsinsi-ubong.

## Owo Usua

Udiana eyeneka-nnwan akayat esit ye ererimbot. Ukem nte mfuho eyeneka esie nnwan, enye edikere ete ke owo efen akanam ofuri mme mfina ke uwem esie. Enye obobiom ufokemana, ufan, ete-utom ye mbon-utom esie, polisi, ye mbohoidung, mme adausung eke Ufok Abasi, usung edisine nkpo eke eyo emi, kpa odudu uyama eke utin, ye ata ndiokiso. Ndien enye eyesue kpukpru nkpo.

Enye ikeikutke idemesie nte idiokowo. Ke usung efen, enye ekekere ete ke imo inyung ida ino idemesie kpot. Enye onim ete ke kpukpru mbon efen, ekenam nkpo eto ndima idem ikpong, mkpri-nkpo ye ufip. Enye, ke nkang efen, akanam nkpo oto nti ekikere—utip-ikpe, akpaniko, ye ima.

Ke ndiokiso, mbon emi ekerede nkpo nte idat eyeneka-nnwan emi ewak eti-eti. Ekekut emi ke mmi-mmi ukpeb emi nte edungore mme mfina ke ufot ebobo mbon umia-ata. Nte ubaknkpo ke ukpeb oro, mme andidungore ema-ebup mbon Palentine ye Israel ke Middle East ye mbon Republican ye Democrats ke United States. Mmo edikut ete ke “nkang kiet ekere ete ke ebobo mmimo [ekanam] ediwak nkpo ke

ima akan ndisusua, edi kini ebupde ntak emi mbon umia-ata ke ebobo eken [edukde] edi ke mfina oro, [mmo] ewut usua nte ntak mfina eke ebobo [eken].”<sup>3</sup>

Ke iko efen, ebobo kiet-kiet ekut idem mmo “nte nti owo”—esian, efon-ido, enyung enam-akpaniko Ke usung efen, mmo edibat ebobo umia-ata eken nte “ndioi owo”—iboho-etop, enana-akpaniko, enyung ediok.

Ke isua eke ami nkamanake, ererimbot okodu ke akamba ekong emi ekesinde akwa ntuanga ye akamba mfuho ke ererimbot. Ekong emi okotongo oto ebobo mme owo eketode idut mi—mme owo emi ekekutde ebobo mbon efen nte idiok ndien etongo usua ye mmo.

Mmo enam mbon eke mmo mimaha edu ke ndobo. Mmo esuene enyung ekuni mmo. Ekut mmo nte uke-uke owo—kpa ndikpri nkan ubonowo. Ndien inikiet emi mbufo esede ebobo mme owo efen ke ndek, mbufo eyeyom idiok iko nditing nnyung nam afai ye mmo.

Ami mmedighe ke nte nkereke mbanga se iketibede ke 20th-century Germany.

Kini owo asuade onyung etrede ndinyime ye nnyin, odiok ndikere ete ke enyene nkpo se minenke ye mmo. Ndien tongo do odu ekpri nde emi adianade ata-idiok ntak ono iko ye edinam mmo.

Nte ededi, kpukpru ini nnyin inyene ndida nno nkpo emi enende, ndin odu mme ini emi anade nnyin imenere uyo nnyin ke ntak oro. Nte ededi, kini nnyin inamde oro ye iyatesit ye usua ke esit nnyin—kini nnyin itingde idiok iko ye owo efen man abiak, esuene, mme ndikpan mmo—ekeme ndidi ke nnyin inamke oro ye edinen-ido.

Nso ke Andinyanga ekekpeb?

“Ami ndoho mbufo nte, ema mme asua mbufo enyung ebong akam eyom ufon mmo eke enamde mbufo isin-enyin;

“Man mbufo edi ndito Ete mbufo emi odude ke heaven.”<sup>4</sup>

Usung eke Andinyanga edi emi. Edi akpa ndaha ke ndibiat ubiongore emi otongode okposong ifiopesit, usua, ubahare, ye afai ke ererimbot.

“Ihn,” mbufo emekeme nditing ete, “Ami nyenyime ndima mme asua mi—edieke mmo nko enyimedede ndinam ukem oro.”

Edi mfina iduhe do, nte odu? Nnyin inyene ubiong ino ndikpono Abasi nnyin, ndien oro enyene ekpri—edieke odude—se anamde ye usung nte mbon efen enamde nkpo ye nnyin. Nnyin imenim ete ke mmo eyenyene ifiok ye ima nko, edi ima emi nnyin inyenede ino *mmo* edi ikongoke ke se mmo ekerede ebanga *nnyin*.

Ndusuk ukeme nnyin ke ndima mme asua nnyin eyenam esit mmo emem onyung osong mmo ono ndinam eti nkpo. Ndusuk oro idnamke. Edi oro idikpuhokere unyime nnyin ke nditiene Jesus Christ.

Ntem, nte mbon Ufok Abasi Jesus Christ, nnyin iyema mme asua nnyin.

Nnyin iyekan ifiopesit ye usua.

Nnyin iyeyoho esit nnyin ke ima ino ofuri ndito Abasi.

Nnyin iyessin unwam inyung inam nkpo ino mmo—kpa mbon emi ekpe “sinde [nnyin] enyin, enyung ekobode [nnyin].”<sup>5</sup>

#### Ata Eti Mbet

Eyeneka-nnwan oyoho ita ada ono eti mbet Jesus Christ. Enye ama anam nkpo oro eke okposongde ndinam: enye onim Abasi ke akpaniko kpa ke ndaha esuene ye nsongo nkpo. Ke usung ekededi enye omum mbutidem ye idorenyin esie akama, isehe nsahi ye emiom emi akanare enye okuk. Enye okodu uwem ke idaresit idige koro ndaha esie ama ofon edi koro *enye* ama enyene oyoho idara.

Iduhe owo nnyin eke minyeneke ubiong ke uwem isong. Dian ye ata ediwak odudu emi oyomde ndimen nnyin nworu mkpong usung, didie ke nnyin ikpewuk mbutidem nnyin ke oyoho ubong inemesit emi ekenwongode eno mme anam akpaniko?

Ami mmenim ke imekeme ndikut iboro ke ndap emi prophet ekenyenede ke mme tosin isua ke edem. Enying prophet oro edi Lehi, ndien ewet ndap esie esin ke Nwed Mormon.

Ke ndap esie, Lehi ama okut akpa-inwang ndien, ke esit inwang oro, eti eto kiet emi ekeyede akan nte ekpetingde odu. Enye nko ama okut mme eboho owo eyomde usung mmo ndikisim eto oro. Mmo ekeyom nditabi edinem mfri esie. Mmo ekekere enyung enim ete ke eto oro eyeno mmo akwa inemesit ye ata emem.

Mkpfafaha usung kiet ama odu emi adade ekesim eto oro, ndien esang-ukwak ama odu ke usung oro emi akanwamde mmo ndisanga ke usung oro. Edi ekim ntukube nko ama odu emi obiongore mmo ndikut usung ye eto oro. Ndien ndusuk ata ndiok-nkan ekedi uyom nsahi ye esuene emi oworode oto akamba ye ana-inwang ufok emi akadade ekpere. Ke ndidighe, nsahi oro ama anam ubak owo emi ekesimde eto oro enyung etabide inem mfri esie man etongo ndikop buut enyung edutin usung.<sup>6</sup>

Ndusuk mmo ema etongo ndiyik ete ke eto ama eye ke nte mmo ekekerede ke akpa-ini. Ndusuk mmo ema etongo ndibup mbanga akpaniko ke nkpo emi mmo ekefiokde.

Ekeme ndidi mmo ekekere ete edieke mmo ewongore ekpong eto oro, ke uwem eyemem. Ekeme ndidi owo idisueneke inyung isakke mmo nsahi aba.

Ke akpaniko, mme owo emi ekesakde mmo ekebiet nte mbon emi enemde esit enyung enyenede ini mbre. Ntre, ndusuk edieke mmo esinde eto oro, eyedara ebo mmo esin ke otuowo eke akwa ye ndinwanga ufok oro ndien edara mmo ke ubiere, oniong, ye ifiok-nkari mmo.

#### Esanga ke Usung oro

Ndima ndito-eka iban, ndima ufan, edieke etiede nte osong ono mbufo ke ndimum esang ukwak

nnyung nsanga sung-sung nkesim erinyanga, edieke nsahi ye esuene mbon efen emi okponde anam mbufo enyek-idem; edieke mbufo efinade idem oto ke mme mbume ye ukpebnkpo eke minwangake mbufo kanga; edieke mbufo efuhode oto ke edikpu, ami ndoho mbufo nte eyak eti ndap Lehi.

Esanga ke usung oro!

Ekusana esang ukwak oro eyak—iko Abasi!

Ndien kini owo ekededi oyomde ndinam mbufo ekop buut oto ke nditabi ima Abasi nkop, ekukupang-utong eno mmo.

Ekufre ete, ke afo edi eyen Abasi, ke emenim nti edidiong eno mbufo; edieke mbufo ekemedede ndikpeb man enam uduak Esie, mbufo eyedu uwem ofon ye Enye inikiet efen!<sup>7</sup>

Mme enwongo itoro ye edinyime eke ererimbot ikemke, idige akpaniko, ndien idiyuhoke ke akpatre. Ke nkang eken, mme enwongo Abasi, ye oyoho idaresit—idahaemi ye ke nsinsi.

Ami ndoho mbufo nte yak ekere-ebanga edu-ukpono ye mbutidem ke akamba ndaha. Iduhe nkpo emi otode akwa ye ana-inwang ufok emi ekemedede ndida-ndomo ye mfri eke odu-uwem iko Abasi Jesus Christ.

Ke akpaniko, “se enyin mikwe, utong minyung ikopke, se minyung idukke owo ke esit ndikere, nkpo ekededi eke Abasi ekebengede onim ono mmo emi emade Enye.”<sup>8</sup>

Ami mmekpeb nno idem mi nte ke usung ndidi-mbet ke iko Abasi Jesus Christ edi usung eke adade aka idara. Oro edi usung uboho ye emem. Oro edi usung akpaniko.

Ami mmesongo nte ke mbufo eyekpeb emi eno idem mbufo oto ke eno ye odudu Edisana Spirit.

Ke ini emi, edieke usung oro osongde ono mbufo, ami mmenim ke mbufo eyekut uboho ye osongde ke mme nti nka nnyin emi odude ke Ufok Abasi—nka Primary, Young Women, ye Relief Society. Mmo etie nte ndausung ke usung

oro, emi mbufo ekemedede ndifiak nnyene uko ye mbutidem ke usung-isang emi edikade iso. Mmo edi ufok uboho, emi mbufo edikopde emem enyung ebo osongo eto ndito-eka mbufo iban ye nsanga mbufo eken.

Mme nkpo emi ekpebde ke Primary eyebenge mbufo ono akpaniko efen emi mbufo edikpebde nte nkaiferi iban. Usung mbet emi mbufo esangade ke class Young Women eyeda ekesim ebuana ye eboho ndito-eka iban eke Relief Society. Dian ye ikpat kiet ke usung oro, emeno mbufo ufang efen ndiwut ima mbufo nno mbon efen oto ke mme edinam esit-mbom, ima ye utom-unwam.

Ndimek usung owo-mbet emi ada ekesim inemesit ye uyuho eke edisana udout obot mbufo.

Nkpo oro idimemke. Oro eyeyom ata eti nkpo emi nnyin inyenede— ofuri ikikke, ifiok, mbutidem, akpaniko, odudu, nsinifik ye ima mbufo. Edi ke usen kiet mbufo eyefiak ese ebanga ukeme mbufo, ndien sese, mbufo eyenem esit koro mbufo ema enyene nsongonda, koro mbufo ema enim-ke-akpaniko, ndien ikoworoke ikpong usung.

#### Eka Iso

Ekeme ndidi ediwak nkpo odu kabanga uwem eke akande ukeme mbufo. Edi ke akpatre, mbufo eyenyene odudu ndimek utit-isang mbufo ye ediwak ifiok-ukpeb mbufo ke usung oro. Oro idige ediwak nkpo eke ukeme mbufo, edi oto mbumek mbufo emi edinamde ukpuhore nkpo ke uwem.<sup>9</sup>

Mbufo idiyakke idiok-itie anam mbufo efuho.

Mbufo idiyakke mmo enam mbufo edi idat.

Mbufo emekeme ndidara koro afo edi eyenanwan Abasi. Mbufo emekeme ndikut idara ye inemesit ke mfon Abasi ye ke ima eke Jesus Christ.

Mbufo emekeme ndidat-esit.

Ami mmebenge mbufo nte yak eyoho esit mbufo ye ekom ke ediwak ye anana-adanga mfon Abasi. Ndiman ndito-eka mi iban, mbufo emekeme ndinam emi! Ami mbenge ye ofuri ima eke ukpong mi nte yak mbufo enam mbumek ndika iso nsanga ntiene eto uwem. Ami mbenge yak mbufo ekpemek ndimenere uyo mbufo ke enyong enyung enam itoro-ubong, ke ndikop idaresit ke ima Abasi ye ke mme utibe nkpo emi Ufok Abasi Esie ye iko Abasi

Jesus Christ ekemedede ndida nsok ererimbot.

Ikwo eke eti owo-mbet idinemke inyung iworoke uyo okpon ino ubak owo. Totongo ke editongo ini emi osuk esidi ntre.

Edi kabanga Ete nnyin ke Enyong, ye mmo emi emade enyung ekponode Enye, ikwo oro edi osongurua ye inem ikwo—sung-sung ye edisana ikwo ima erinyanga ye utom-unwam nno Abasi ye owo efen.<sup>10</sup>

Ami mmeyak edidiong mi nte Isungutom Abasi nte yak mbufo enyene osongo ndinwana nte eyenanwan Abasi kini edarake esanga kpukpru usen ke usung ubong eke owo-mbet. Ke edisana enyin Jesus Chrst, amen.

#### MKPRI NWED

1. Seke 2 Nephi 2:14, 26.
2. Seke Luke 15:4–6.
3. Boston College, “Ekut ke Ukpebnkpo kabanga Anana Ntongo Mfina Otode Unanafiok eke Nsinifik,” *ScienceDaily*, Nov. 4, 2014, sciencedaily.com.
4. Matthew 5:44–45.
5. Matthew 5:44.
6. Seke 1 Nephi 8.
7. Seke “Ami Ndi Eyen Abasi,” *Nwed-ikwo Nditowong*, 2–3.
8. 1 Corinthians 2:9.
9. Kese “Ata Akpan Eti Nwed Iko Ibuot eke Ofuri Ini,” [pegasuspublishers.com/blog](http://pegasuspublishers.com/blog).
10. Seke Alma 5:26